



Sept. 25-iat 2024

UKA2024/25

FILMILIORTARNEQ PILLUGU INATSISARTUT INATSISAAT

(Siunnersuuteqartoq: Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Qangarsuaq oqaluttuat inummit inummut ingerlateqqinneqartartut maanna inuit issittormiuusugut pisoorsuaatigivagut; Kaassasuk, Sassumap Arnaa, angakut allarpasuillu. Oqaluttuat kimeqarluartut inuunermut ileqqorissaarnissamut tikkuussisuusut. Qanoq ilaa tamakku pitsaassuseqarluartumik nunanilu tamani takuneqarsinnaanngorlugit sananeqartuuppata tupinnaq, pisuunnguallannaq tulluusimaarnarlu?

Oqaluttuat ullutsinni assigiinngitsorpassuartigut ilusilerneqartarput, taakkunanilu maanna pingaartut ilagivaat filmiliortarneq, isiginnaagassiat aalasuliat. Nunani allani filmiliortarnermut inatsiseqaramik allamiunik filmiliortoqassatillugu akiliisitsisarput, nunap iluanaarutigisartagaanik. Aammalu filmiliornermi sulineq annertoorujussuummat filmiliortunut aningaasartaqarluartitsineq siunertarineqartarluni, aningaasartuutinik procentinik aalajangersimasunik utertitsisinaanikkut.

Ukiut ingerlanerinni aalasulianik isiginnaagassinneqartalernerput persuarsiuutigisarpaput. Ilami nunaqqatigut ilisarnartut filmertarfissuarmi tv-kkulluunniit takullugit tanngattaraagut, persuarsiotaaraagut, qamuuna iluklut ajugaaqataasaraagut nuannaartorisarlutigillumi. Kiisa maanna aalasuliani inuttaasartut Hollywoodikkunnut qaaqusaasalerput allaat isiginnaagassiat aalasuliat unammisinneqarnerinni unammeqataasalerlutik. Kakkaak.

Tuukkaq Teaterikkut Silamiukkullu ullumikkut inuiaqatigiinnut sunniutaat, kingornutsitaat, eriagisassaraarput. Taakku makkuninnga inatsiseqartitaanatit atugarissaartitaanngivissorlutik, kisianni siunertamik toqqammaveqarlutik, inuiaqatigiinnut maanna kingornutsitaannut qujamasuutissaqarluuqigatta. Taakkoqarsimanngippammi ilimagisinnaanngilara uunga inatsisissatut siunnersuummut killissimassagaluarnarluta? Ataqqinarput inuit taamatut toqqammaviliisut. Ileqqutsinnik eriaginningaarlutik akissaq pingikkaluarlugu sukataarlutik toqqammaviliilluarnikummata.

Inuiattut ilisarnaatsinnik takutitsisarneq kikkuunitsinnik ersersitsisuusarpoq kinguaanullu tulluuttunut oqaatsitsinnik, ileqqutsinnik, piffissami susoqarsimaneranik oqaluttuarisaanermillu ingerlatitseqqiisarlutik takutitsisuusarlutillu. Minnerunngitsumillu isumanik allakkajaanik eqqarsalersitsisinnaasarlutik.



Taamatut filmiortarneq oqaaseqarfigilaariarlugu Siumumiit inatsisissatut siunnersuummi uku maluginiarpagut:

- Eqqumiitsuliornermut Aningaasaateqarfik 9,7 mio. kr-iusut tassanga 3,9 mio kr filmiiornermut inatsisissamut nuutsinneqarniartut. Siumumiit isumaqarpugut Eqqumiitsuliornermut Aningaasaateqarfik ilanngarterneqassanngitsoq aningaasalli filmiiornermut inatsisissamut tuttussat allamit kontomit aaneqartariaqartut, tassami ileqqutsinnik, kulturitsinnik, aningaasaliisarnerit ilanngartorneqassanngitsut isumaqaratta, illua'tungaanili aningaasaliinerit suli amerlarnerusut pisariaqartikkigit, inuiaqatigiit anersaakkut immersorneqarnissaat pisariaqarluinnarmat.
- Kalaallit Nunaanni filminstituteqalernissaq Siumumit taperserparput, tassanga ilinniartitsinerit filmiiornerup silarsuaata iluaniittut ingerlanneqartalissasut, nunatsinnilu filmiliat siammarterneqarnissaat ingerlatsinerillu assigiinngitsut parabytut inissilluni suliassarilissammagit.
- Nunanit allanit nunatsinnut filmiioriarniarlutik qinnuteqarnermikkut malittarisassaasut sinaakkutissaallu Siumumiit saqqummiunneqarnissaat qilanaaraarput. Tassunga tunngatillugu nuannaarutigivarput tamanna sinaakkuserneqassammat, affarlitsinnummi filmiioriaannarunnaarlutik maanngarsinnaanngornissaat qilanaarilereeratsigu.
- Aningaasanik atukkanik utertitsisinnaanissamut aningaasartuutit 3 mio missaanniittut taggiunneqarsimasut allaminngaanniit aaneqassasut kissaatigaarput.
- Inatsisissatut siunnersuummittaag siulersuisut nunatsinneernissaat allaqqavoq, allaqqaqqissaarlutik suliffeqarfimmit peqatigiiffimmiilluunnit sorlermit aaneqassasut. Siumumiit tamanna allanngortikkusupparput, tassami nunanut allanut attaveqarnikkut suleqateqarnikkullu suliniutit internationaliusut pitsaanerusumik aqutissiuunneqarsinnaammata, taamaammallu tassani oqaasertat aaqqinneqarnissaat kissaatigivarput
- Nunatsinni filmiliat ataatsimut katersaatigineqanngillat, allaammi filmiliat originalitai ilaatigut tammartalereersimapput. Naalakkersuisut tusarniaanerminni tamanna paasisimallugu akissuteqarsimapput Nunatta Atuagaateqarfiata tamanna suliassarigaa, taamaattumillu tamanna taakkunannga sularineqassasoq. Siumumiit isumaqarpugut Filmiornermut institutissap tamanna tamakkiisumik suliassaattut ilanngunneqassasoq, sulineq torersumik ingerlanneqassammat aammalu filmit ataatsimoortillugit inissinneqarpata pitsaasutut atuisunut ilinnialersussanullu sunniuteqarniassammat.

Taamatut oqaaseqarluta ilinniartitaanermut, kultureqarnermut, ilisimatusarnermut ilageeqarnermullu ataatsimiititaliamut ingerlateqqipparput.

Najaaraq Møller
Siumut